



## Biblia Yote ni Kamilifu

**M**aana unabii haukuletwa po pote kwa mapenzi ya mwanadamu; bali mwanadamu walinena yaliyotoka kwa Mungu, wakiongozwa na Roho Mtakatifu.—2 Petro 1:21.

Kabla ya kuingia kwa dhambi, Adamu alikuwa na mawasiliano ya moja kwa moja na Mwumbaji wake; lakini tangu mtu alipojitenga na Mungu kwa kuasi, jamii ya wanadamu imenyimwa fadhila hii muhimu sana. Kwa njia ya mpango wa wokovu, hata hivyo, njia imefunguliwa ambapo wakazi wa dunia wanaweza tena kuwa na uhusiano na mbingu. Mungu amewasiliana na wanadamu kwa njia ya Roho Wake, na nuru ya Mungu imetolewa kwa ulimwengu kwa njia ya ufunuo aliowapatia watumishi aliowachagua. “Wanadamu walinena yaliyotoka kwa Mungu, wakiongozwa na Roho Mtakatifu” (2 Petro 1:21).

Katika kipindi cha miaka elfu mbili na mia tano ya kwanza ya historia ya mwanadamu, hakukuwa na ufunuo ulioandikwa. Watu waliofundishwa na Mungu, waliwasilisha maarifa yao kwa wengine, na mawasiliano hayo yalirithishwa kutoka kwa baba kwenda kwa mtoto, kutoka kizazi kimoja hadi kingine. Matayarisho ya neno lililoandikwa yalianza wakati wa Musa. Ufunuo uliovuviwa ulikusanywa pamoja na kuunda kitabu kilichovuviwa. Kazi hii iliendelea katika kipindi kirefu cha miaka elfu moja na mia sita—kuanzia kwa Musa, mwanahistoria wa umbaji na sheria, hadi kwa Yohana, mwandishi wa ukweli mzuri wa injili.

Biblia inamtaja Mungu kuwa ndiye mtunzi wake; lakini Biblia iliandikwa kwa mikono ya wanadamu; na katika mitindo tofauti ya vitabu vyake mbalimbali inadhihirisha tabia mbalimbali za waandishi kadhaa. Ukweli wote uliofunuliwa una “pumzi ya Mungu” (2 Timotheo 3:16); lakini umeelezwa katika maneno ya wanadamu. Yeye Aliye wa Milele kwa njia ya Roho Wake Mtakatifu aliangazia nuru katika akili na mioyo ya watumishi Wake. Amewapa ndoto na njozi, ishara na mifano; na wale waliofunuliwa ukweli huo waliuweka katika mawazo na lugha ya kibinadamu.

Amri Kumi zilitamkwa na Mungu Mwenyewe, na ziliandikwa kwa mkono Wake Mwenyewe. Zilitoka kwa Mungu, na hazikutokana na utunzi wa kibinadamu. Lakini Biblia, pamoja na ukweli wake mtakatifu, ambao umeelezwa katika lugha za kibinadamu, huonesha muungano wa Mungu na mwanadamu. Muungano kama huo ulikuwepo katika asili ya Kristo, ambaye alikuwa Mwana wa Mungu na Mwana wa mtu. Kwa hiyo, ni kweli juu ya Biblia, kama ilivyokuwa kweli juu ya Kristo, kwamba “Naye Neno alifanyika mwili, akakaa kwetu” (Yohana 1:14).

Ikiwa imeandikwa katika zama tofauti, na watu waliotofautiana katika hadhi na kazi, na katika uwezo wa kiakili na kiroho, vitabu vya Biblia huonesha tofauti kubwa katika mtindo, kadhalika tofauti katika asili ya masomo yanayofunuliwa. Miundo mbalimbali ya tungo imetumiwa na waandishi mbalimbali; mara nyingi ukweli ule ule umeelezwa na mwandishi mmoja kwa namna ya mvuto zaidi kuliko mwingine.... Na kweli zilizofunuliwa hivyo huungana kuunda kitu kimoja kizima kikamilifu, kinachofaa kukidhi mahitaji ya watu katika mazingira na uzoefu wa maisha (Pambano Kuu, uk. 4–5).